

**Ta comerciantenan cu a
yena informacion robes
a haya placa dimas y
mester paga bek**

Te comerciante mes tin culpa si el'a gaña SVB

CU DOS MALETA DEN MAN: HOMBER HOBEN DRUMI MEMEY DI GREEN CORRIDOR



Splitising grandi den AVP; Varios partido nobo lantando for di AVP



Armand Hessel su 300 mil florin haya di Gobierno a caba?

Segun Hessel cu
gas ta mas caro
cu fuel oil



E berdad di dos scol na Haiti: Na 2010 Mike a
presenta durante radiotion

PA CADA 1 FLORIN CU PUEBLO DUNA, GOBIERNO A PONE 2

Pueblo a duna 500 mil, Gobierno a pone 800 mil



Participa den e
**Encuesta Nacional di Salud:
STEPS 2023**

di cas pa cas for di maart te cu juni

Dal e paso pa bo salud!

Turista a bolter cu su quad racer y a bay cay den mondi




Arashi: Diasabra den careda di 12'or y mey di merdia a sosode un accidente cu un quad racer riba e caminda di Arashi pa bay California Lighthouse. Un homber turista riba un quad racer pa un of otro motibo a perde control y a bolter cu su quad racer y a bay cay den e mondi canto di caminda, net den e bocht skerpi. E homber a bay cay den matanan di hubada y cadushi.

E turista a keda herida y tabata tin mester di asistencia medico. Mesora a pidi pa presencia di polis y ambulance.

Na yegada e paramediconan di ambulance mesora a bay atende cu e turista herida. Na momento cu mester a hisa e victima y pone riba e brandcart, e polisnan na e sitio a asisti e paramediconan, door di yudanan lante for di riba abou pa pone riba e brandcart.

Despues cu e paramediconan a stabilisa e homber, a transport'e pa hospital. Polis di trafico tambe a presenta na e sitio pa haci mas investigacion.



HACI PAGO DI ABONEMENT ONLINE TA POSIBEL:

APRECIABLE CLIENTELA, SI BO TA DESEA DI HACI E PAGO DI ABONEMENT ONLINE, E TA POSIBEL:

ESAKI TA NOS CUENTA:

SUNMAX PRINTERS - STA. CRUZ 110

BANCO: RBC

NUMBER DI CUENTA: 7700000100152447

DI ANTEMANO,
MASHA DANKI.

SOLO DI PUEBLO



E berdad di dos scol na Haiti: Na 2010 Mike a presenta durante radiotion

PA CADA 1 FLORIN CU PUEBLO DUNA, GOBIERNO A PONE 2

Pueblo a duna 500 mil, Gobierno a pone 800 mil

E berdad mester wordo recorda y wordo bisa. SOLO DI PUEBLO a tuma nota con un di e voceronan haragan di Mike Eman kier a troce e berdad riba e dos scol na Haiti cu gobierno di Aruba a traha.


Segun e vocero Andrade a bisa, Gobierno no a pone ningun cent! MENTIRA!

Dia 25 di Januari 2010, e grabacion di Tele Aruba tey, ora cu Mike Eman a yega Aruba Entertainment Center cu 100 coordinador su tras. Ora el'a bay den entrevista, el anuncia cu Gobierno di Aruba lo pone 2 florin, pa cada 1 florin cu pueblo pone.

Den e caso aki, pueblo a pone casi 500 mil, y Gobierno a pone casi 800 mil totalizando 1.3 miyon florin.

Declaracion haci mas despues dor di Mike Eman, el'a bisa cu el'a pidi Rode Kruis pa usa e placa genera dor di collect pa bay pa material, etc, y pa laga loke Gobierno pone pa traha dos scol.

Pues, un ves mas por tuma nota con infantil e "periodista" Andrade ta, pasobra tur loke e kier haci ta fabrica storia, defende Mike Eman, pensando cu si Mike yega bek den Gobierno, e lo bolbe cuminza biaha rond mundo teni na chan di Mike.



Armand Hessel su 300 mil florin haya di Gobierno a caba?

Segun Hessel cu gas ta mas caro cu fuel oil

Recientemente por tuma nota cu Armand Hessel a manera haci un comeback. Den su ultimo aparicion, el'a saca su gal riba Gobierno di MEP, creando tur sorto di storia chupa for di su duim, of inventa cu su ded'i pia.

Ta fresco den nos memoria con Armand Hessel algun tempo pasa a pidi 300 mil di gobierno di MEP, pe haci investigacion riba corrupcion.

No ta mucho dia pasa, huez a dicta sentencia riba AVP, cu 11 aña di castigo di prison pa nan gang,

netamente riba corrupcion. Unda su voz a keda?

Parce cu esey no a significa nada pa Armand Hessel, pasobra el'a haya ta bon pa cuminza un atake pisa contra MEP, basa riba mentira y mentira.

Den henter su storia fabrica contra MEP, a resalta un cos: Armand Hessel no sa net nada di diferencia entre gas cu fuel oil.

Ta ridiculo ora un ex meneer di scol, cu ta suppose di tin poco educacion, habri su boca

pa bisa cu e prijs di gas ta mescos cu esun di fuel oil.

Que estupides! Que berguenza!

E por a busca conseho serca expertonan pa e por haya sa con e prijs di gas cu fuel oil ta corela cu otro. Gas semper ta mas economico cu fuel oil. Te discucion aki e kier trece? Que tristesa!

Lo ta su 300 mil cu el'a cobra, a caba? Lo e kier otro 300 mil pe sigui conta storia di Cha Nanzi?



Gobierno di MEP no ta cobrando ningun hende placa bek di SVB

Ta comerciantenan cu a yena informacion robes a haya placa dimas y mester paga bek

Te comerciante mes tin culpa si el'a gaña SVB

Recientemente algun persona ta alega cu Gobierno di MEP a duna comerciantenan placa durante pandemia y cu awor ta cobrando nan bek.

Esaki ta un mentira flagrante.

Gobierno no ta cobrando bek ningun comerciante placa cu nan a haya pa loonsubsidie durante pandemia.

Ta e comerciante mes a yena informacion robes y a asina a saca probecho y a haya mucho mas placa cu e tin derecho riba dje. Si e comerciante tabata sincero, e lo no a haya placa dimas y awe e no mester paga bek.

Pues, esaki ta un splicacion pa esnan mal informa y cu ta papia coy loco y sin base.



CMB: Stimulando Inclusion y Empoderamiento den Deporte pa medio di Beyond Sport Limits Foundation y Ronde Van Aruba



Caribbean Mercantile Bank N.V. (CMB) ta orguyoso di su sosten continuo na Ronde Van Aruba, e evento di careda mas grandi di e isla, pa di 31 aña consecutivo. “E aña aki, nos compromiso cu deporte y e Obhetivonan di Desaroyo Sostenibel (SDGs) ta bai mas leu cu deporte mes, ya cu nos ta patrocina tambe e fundacion nobo Beyond Sport Limits Foundation, un organisacion sin fin di lucro cu ta enfoca riba promove inclusion y dignidad den deporte pa personanan cu limitacion fisico”, Sr. Ilán Lopez di Caribbean Mercantile Bank N.V. ta expresa.

Beyond Sport Limits Foundation a ser funda pa Disjondrick Jacobs, un hoben cu Cerebral Palsy ken, apesar di no por move independientemente, a bira un defensor inspirador pa inclusion den deporte. Determinacion y pasion di Disjondrick a yud’e participa na Ronde Van Aruba hunto cu un grupo di atletanan dedica cu a pusha su Race Cart durante henter e trayectoria. Su storia ta un testimonio di e poder di trabou den ekipo, resistencia y esprito

humano.

E palabranan fuerte di Disjondrick, “Ta tuma un persona pa cuminsa algo pa otro por sigui,” ta sirbi como un recordatorio cu tur hende tin e capacidad pa haci un impacto positivo den nan comunidad. CMB ta honra pa sostene tanto Beyond Sport Limits Foundation como Ronde Van Aruba, organisa pa Mariniers Kazerne Aruba, segun nan ta promove un movimiento fuerte di inclusion, dignidad y deportivismo pa tur.


Hunto, CMB, Beyond Sport Limits Foundation y Ronde Van Aruba ta kibra bareranan y empodera personanan cu limitacion fisico pa participa den deporte, desaroya confiansa y crea un sentido di comunidad. “Nos ta kere cu tur hende mester tin e oportunidad pa experiencia e emocion di competencia y e camaraderia di trabou den ekipo, sin importa nan limitacionnan fisico” Sr. Sr. Ilán Lopez di Caribbean Mercantile Bank N.V. ta finalisa.

CMB ta invita henter Aruba pa uni cu nos pa celebra e logronan di Disjondrick y Beyond

Sport Limits Foundation, mientras nos ta sigui sostene iniciativanan cu ta promove inclusion y inspira cambio positivo den mundo di deporte y mas aleu.



Chauffeur deteni: Peaton alcanza pa Nissan Silvia cu bay haci fever



Schotlandstraat - Diabierna anochi algo pasa di 9'or un cabayero Hulandes ta wordo gedald pa un Nissan Silvia.

Esaki a bira un caso di hit&run, debi cu e Nissan Silvia cu varios pintura ariba dje a bandona e sitio mientras e peaton a keda herida atras.

Na prome instante a wordo bisa cu e peaton a fractura ambos pia, pero na yegada di Ambulance por a mira cu e cabayero Hulandes cu ayudo a cana drenta e ambulance.

Por a nota si cu e tawata herida, debi cu un di e su pianan tawata sangra bastante door di un corta serio.

Nissan Silvia a bay direccion Hato/Tanki Flip. Na Hato e la stop un rato.

Polisnan atento a spot e vehiculo y tawata sa unda pa busca. Na un adres di Tanki Leendert nan a haya e vehiculo y e chauffeur cu

ta wordo deteni mesora.

E auto tambe a wordo confisca y hiba pa warda di Shaba, unda lo haci un investigacion ariba dje.

Transportwagen a presenta na Tanki Leendert y ta tuma e chauffeur over unda e la wordo hiba warda di Shaba y presenta dilanti Sub Fiscal.

Na Schotlandstraat polis di trafico a presenta pa haci su investigacion y tambe Paramediconan a opta pa bay cu e cabayero Hulandes Hospitaal pa mas atencion medico.

Caminda a keda cera pa basta rato unda a haci investiacion, pa mira exactamente unda e chauffeur a draai e auto y dal e peaton cu no tawata ariba caminda.

Algun rato prome cu 11'or caminda a wordo habri bek, despues cu un investigacion riguroso a tuma luga.



Splitising grandi den AVP; Varios partido nobo lantando for di AVP

Informacion cu SOLO DI PUEBLO a ricibi den fin di siman ta indica cu tin varios partido politico nobo cu lo bay lanta den e dianan siguiente. Informacion clave ta bisa cu varios cu lo wordo lanta, ta esnan cu a split for di AVP.

Un partido cu ta den full swing den preparacion secreto ta esun di Juan David Yrausquin. Juan David den pasado ya a fracasa caba como politico. El'a forsa bisti sapata mas grandi cu su pia y djey a haye ta entrega retiro bao yoramento, ora cu el'a bay Hulanda y nan a lage un dia completo sinta ariba banki, sin atende.

Otro mas cu lo ta hasiendo tur lo posibel pa keda cla cu partido ta Otmar Oduber. Su preparacion tambe segun tin bisa, ta canando. Maske cu ainda e ta sperando riba noticia di Ministerio Publico, cu e caso Flamingo a termina.

No ta nan dos so ta lantando partido nobo, pero tambe Gerlien Croes ta moviendo pa lanta partido nobo. Recientemente el'a celebra cu su 10 aña di prohibicion di drenta Merca a termina, unda e por a bolbe drenta, segun caya a papia.

Rycont ta otro mas cu te ainda no sa ki direccion e lo tuma.

Otro nobo cu tambe lo a bandona AVP, pero no a pronuncia nada ainda ta polis Candelaria. E tambe tabata number



8 riba e lista di ultimo eleccion, pero al parecer el'a entrega retiro for di AVP, pero nunca el'a sali den publico pa declara esey. Nos ta spera cu Candelaria no keda keto, y e tambe haci su anuncio, si e ta brasa Benny si of no.

Otro politico ta sintando casitgo na Kia y unda nan tin prohibicion pa 10 aña pa no por eherce ningun cargo publico.

Un partido totalloss y prinicalmente loke a frega nan, ta e brasa cu nan a duna na corrupcion, ora te hasta despues di sentencia di huez cu a dicta Benny pa corrupto, ainda nan a bay cas di partido pa celebra cu nan a horta pueblo.

Den un solo conclucion: Un persona cu poco enseñansa, mester por compronde cu loke e partido ta hasiendo ta totalmente inacceptabel. Pesey mes su division y splitsing grandi ta na caminda.



A Establese den nos clinica

Antonieta Silberie

Orthodontista

Conhunto cu :

Orthodontista: Ahmadu Sint Jago

Dentistanan: Hendrik Marsman
Mike de l'Isle
Sadira de l'Isle
Katterine Arango

Ta ofrese tur cuido dental en general y avansa.
Tambe beugel pa adulto/mucha y Invisalign

Practice for Advanced Dentistry N.V.

Bubali 11-M

Tel: 5873096 / 5873091

Whatsapp: 5945206

MINISTER ENDY CROES TA FELICITA TUR E COREDONAN CU PARTICIPA DEN E 31 EDICION DI RONDE VAN ARUBA



Diabierna ultimo, tabatin e di 31 edicion di Ronde Van Aruba. Un magno evento deportivo cu rond di 700 coredo cu a participa y un total di

206 ekipo di entre otro, single, duo y estafette. Minister di Deporte Endy Croes a duna un discurso, deseando tur e participantenan exito. Pa



exactamente 8 ordianochi, mandatario di Deporte a tira e "cannonshot" na Marinierskazerne pa duna inicio na e recorrido di 72 km rond di Aruba.

Tabatin hopi ambiente banda di caminda, unda cu famia, colega

y amistadnan di e coredonan a bay duna sosten y apoyo. Minister Endy Croes ta felicita Sr. Johan de Rover y su team di Marinierskazerne cu a organisa e gran evento deportivo aki. Tambe, na Cuerpo Policia, Cruz Cora y tur cu a contribui

pa haci e careda aki exitoso. Ademas di esaki, e mandatario di Deporte ta aplaudi tur esnan cu a participa den Ronde van Aruba 2023. Mashapabien na tur e ganadonan! Cu disciplina, deseo, dedicion y determinacion ta logra.

Minister Endy Croes: HUNTO CU COLEGA MINISTER ROCCO TJON LO INSTALA CAMARA DI SIGURIDAD NA E.P.B. Y S.P.O.

Minister di Enseñansa y Deporte Endy Croes hunto cu colega Minister di Husticia y Asuntonan Social Rocco Tjon ta trahando den colaboracion pa atende cu problema di siguridad na e scolnan E.P.B. Oranjestad, E.P.B. San Nicolas, S.P.O. Santa Cruz y S.P.O. Brazil. Hunto a evalua con por tin un miho maneho riba e hobennan cu tin problema di comportacion y ta causa problema na scol. Tin un plataforma mas grandi cu ta trahando caba via Veiligheidshuis pa tin un solucion mas structural pa e alumnonan aki.

Banda di esaki, Minister Endy Croes hunto cu Minister Rocco Tjon a traha un plan integral pa atende cu e asunto aki di inmediato. A desemboca un team cu ta atende cu e camaranan di siguridad pa haci un evaluacion na E.P.B. Oranjestad, E.P.B. San Nicolas, S.P.O. Santa Cruz y S.P.O. Brazil, unda e cuater (4) scolnan aki lo ta conecta riba un sistema di camara cu ta bou di vigilancia di Cuerpo Policial. Pues, ta bay tin un control severo na e scolnan aki, pa minimalisa violencia na scol.

Tambe, Departamento di Asunto Social lo atende cu famia di e alumnonan cu ta causa problema na scol, pa asina trece tranquilidad y mitiga violencia na scol. Pa finalisa, e proyecto ta den proceso y ta planifica pa dentro di dos (2) luna instala camara di siguridad na e scolnan aki.



Dama turista herida, despues di dal cu su quadramer contra un vehiculo



Tamarijn - Diasabra merdia polis y ambulance a bay pura direccion Bloemond pa Tamarijn, unda a Tourist a accidenta cu quadramer.

Na yegada di polis, nan ta tuma note of a lady turista drumi ariba su barica na banda di caminda. No mucho leu a Chevrolet Spark cu daño dilanti partes.

Paramediconan cu a yega na e sitio mesora a bay atende cu e dama, cu tawata boca abou y herida.

Little little nan a bir'e ya pone ariba e brancard.

Na e sitio nos a compronde cu e dama Turista Ariba e quadramer a kita bay na su man robes y dal contra un Chevrolet Spark estaciona.

Y dama lo tawata den un grupo chikito conociendo e Isla.

Polis di trafico a present and despues di algun rato ambulance a sali direccion Hospitaal cu e Turista.



Cambia perspectiva tocante obesidad: Sa bo number y midi bo peso



MINISTER ENDY CROES TA ATENDE SISSTEM SYMPOSIUM NA UNIVERSIDAD DI ARUBA



Diaranson ultimo, Minister Endy Croes hunto cu Minister Geoffrey Wever a atende SISSTEM Symposium na Universidad di Aruba. Minister Endy Croes a duna un discurso, expresando su alegria pa celebra otro logro, resultado di un bunita colaboracion cu a inicia algun aña atras entre Union Europeo, Universidad di Aruba y Universidad di Leuven, cu a establece “Faculty for Sustainable Island Solution through Science, Technology, Engineering and Mathematics”.

Minister Endy Croes a

expresa cu ta yen’e di alegria di mira con leu e colaboracion aki a hiba nos den un tempo corto y ta orguyoso di Universidad di Aruba cu a percura pa promociona practica sostenibel y consciencia ambiental na Aruba.

Un tremendo simposio, unda a reuni investigado di diferente universidad hunto, buscando solucion pa islanan chikito den Caribe. Minister Endy Croes ta desea tur participante hopi exito y cu ohala cu por extrae un bon resultado di e simposio pa bienestar di Aruba y e otro islanan den Caribe.

Parlamentario Marco Berlis (MEP)

Mike Eman: E destructor di e pensionadonan

Algun dia pasa Mike Eman a sali papia di e pensioen di nos bieunan. Mike Eman a denuncia e situacion di nos grandinan y cu lo mester a subi e pensioen urgentemente. Ainda pueblo por corda con den e dianan cu a pasa Mike Eman a papia di pobresa, e mesun draaiboek di semper, y ora cu finalmente el a haya e reunion publico pa trata esaki, el a sali cana bay 6'or di atardi caba, pa bay su condominium na Marisol Building y sosega curpa. Segun Dowers y Eman ta un entiero nan a bay. E reunion a caba 12:30am, for di ki dia un entiero ta mas di 7 ora largo? Nan no por a bay entiero bin bek e reunion publico di pobresa? Asina nos ta wak cuanto importancia Mike Eman y su Old Boys a duna reunion di pobresa.

Mike Eman a caba cu pensionadonan den su gobernacion di 2009-2017 1. Mike Eman a haci tur pensionado perde nan bashi premie, gelijkbedrag y tambe back to school premie. Haciendo esaki Mike Eman a kita miles di florin pa aña for di pensionadonan cu awor segun Mike Eman ta bibando den pobresa! Ta kende a kita miles di florin aki for di nan entrada? Ta kende a kita pan for di mesa y a haci cu nan a perde cientos di florin pa luna?

2. Middelloodn regeling amata e opbouw di pensioen drasticamente, y pensionadonan a bay atras cu mas cu 1000 florin pa luna. Unda antes pensionadonan tabata

haya 70% di nan ultimo salario, Mike Eman a calcula un promedio di nan salario durante nan carera y duna nan 70% riba esey, masacrando pensionadonan sin misericordia. Pensionadonan a wordo masacra duramente bao maneho di Mike Eman, cu awor kier hunga e "heroe comun!"

3. Mike Eman a subi edad di pensioen di 60 pa 65 aña, asina kitando un biaha mas 5 aña di pensioen for di nos grandinan y ta forsan trahe den nan biehes sin misericordia. Ademá, si nos conta 5 aña di pensioen mes cu nos grandinan a perde na mil florin, Mike Eman a kita mas di 60 mil florin for di nan! Acaso Mike Eman ta kere cu pensionadonan lo lubida su traicion?

Sin pensa dos biaha Mike Eman a traiciona nos pensionadonan cu yen pretextoyawetinecurashi di papia di "e bon comun?" Ora cu Mike Eman e kita miles florin di bashi premie, gelijkbedrag, back to school premie, suta nos grandinan cu un middelloodn inhusto y asina destrui nan entrada, masacrando nan bienestar grandemente, awo ainda bo tin e cuero di cara di bisa cu bo ta bay "redobla" nan pensioen? E unico cos cu Mike Eman tabata bon den dje ta pa "redobla nos debe" nacional unda el a hipoteca nos pais na casi 90% di nos GDP. Nos pensionadonan a haya un "masacre comun" di Mike Eman y a causa e desgracia di nos grandinan den



tempo di bonansa.

Mike a mata e ciudadano cu AOV individualisering Mike Eman a kita e ley den cual un pareha tabata paga belasting, pero solamente esun cu tabata gana mas tabata paga y e otro tabata haya su belasting bek. Si por ehempel e pareha tabata paga 6000fl y 4000fl na belasting por ehempel, cu e areglo bieu nan tabata haya e 4000fl bek. Cu AOV individualisering Mike Eman a kita esaki y e mesun pareha aki awor mester paga e 10 mil florin completo sin haya nada bek. Asina Mike Eman a caba cu e clase medio, sin cu tabata tin un pandemia, sin un crisis economico global, sin un guerra na Ukraina, y sin petroleo halto! Ta Mike Eman mes ta e pandemia, ta e a destrui esnan vulnerabel y nos

pensionadonan. Awe Mike Eman kier hunga e heroe y kier gaña cu e lo redobla pensioen. Bo lo redobla e pensioen mescos cu bo a kita e BBO Mike? Gaña pueblo, manipula nos bieunan, ta loke bo famoso "bon comun" ta siña bo hendenan? Mike Eman a suta nos pensionadonan cu medida y a corta nan entrada y beneficianan completamente y awo e ta preocupa cu nan pobresa? Sr. Mike Eman, pueblo hamas lo lubida

bo traicion y e realidad cu nan mester a biba bao di bo gobernacion! Nunca mas AVP y mucho menos Mike Eman!

Si pueblo desea mas informacion di e articulo aki, contact mi na tel: 528-4639 of email mi na: marco.berlis@parlamento.aw / Bo parlamentario y sirbidor di pueblo na bo ordo semper!



Parlamentario Ricky Hoek (MEP):

Pobresa politico a hisa nos costo di bida

Riba 24 di april ultimo, sr. Eman di fraccion di AVP a pidi un reunion publico pa discuti e tema di “Impacto di poder di compra debi na e aumento dramático di costo di bida”. Tur persona cu a sigui e reunion publico maratonico aki, por a nota cu e persona cu a pidi e reunion mes, esta Mike Eman, a bandona sala di Parlamento despues di un ora y mey cu e reunion ta andando y pa 6’or di atardi Mike a cana bay su penthouse. E reunion aki a termina 12’or y mey di anochi.

Prome cu nos cuminsa papia di probresa di pueblo, ta bon pa nos para keto na e pobreza POLITICO cu nos ta den. Un di e formanan cu pobreza politico ta biba bou di nos hendenan, ta e momento cu nos por a wak con AVP ta celebra corrupcion na grandi. Poniendo un ‘fiesta’ dilanti cas di partido y bisando den tur medio di comunicacion cu e veredicto di Caso Avestrus no ta nifica nada pa e politica y economia di Aruba. Asina AVP ta sigui manipula nan votadornan cu nada no a pasa.

E di dos forma di pobreza POLITICO cu ta aparece den e mesun partido politico aki, ta ora un politico prominente, esun cu a lidera e fraccion di AVP tur e añanan cu Mike Eman a dicidi di no bin traha, esun cu a wordo desilusiona, decepciona, humilia y defama den su mesun partido te ainda ta den un limbo pa si keda cu the old boys of bira independiente tambe.

E di tres forma di pobreza POLITICO ta ora durante e reunion publico ariba menciona, un colega di fraccion di MAS ta bisa cu tin ‘lack of integrity, lack of honesty, lack of hard work’. Awor e pregunta ta; si fraccion di MAS tin ‘integrity y honesty’, dicon e lider di MAS no a sali afo durante e ultimo 3 añanan y bisa cu e tabata un sospechoso den e Caso Kuwkisa y Caso Ibis? Y dicon niun dia fraccion di MAS no a vocifera nan opinion riba e veredicto di Caso Avestrus y Caso Ibis? Acaso pasobra lider



di fraccion di MAS tabata un integrante di partido AVP y sa tur e maniobranan cu nan a haci durante di nan gobernacion? E ta sostene e coalicion di oposicion di AVP ainda?

The old boys ora tabata tin e oportunidad pa mitiga pobreza, conscientemente nan a mitiga nan mesun pobreza pero no esun di pueblo. Durante un gobernacion di ocho aña cu tur e medionan y reservanan financiero cu tabata na nan alcance nan no a traha ni un cas social, no a traha ningun scol, nan no a traha riba drop outs bou di nos hobennan, nan a perhudica nos pensionadonan kitando bashi premie, gelijkbedrag, back to school premie for di nan, a caba di mata caya grandi cu un inversion di un tram cu te awe ta gasto so e tawata tin pa pais Aruba, un caya grandi cu no ta accesibel pa hendenan cu limitacion, y a traha un green corridor cu placa presta y a cuminsa paga esaki na 2018 y lo sigui paga e pa e siguiente 22 añanan. Anto net sr. Eman kier bisa cu e no sa kico ta e rais di e impacto di poder di compra debi na e aumento dramático di costo di bida?

E pobreza POLITICO por keda soluciona ora cu ta yama reunion y keda sinta den sala manera un hende responsabel y no manera un persona cobarde cu no por wak su propio desaster financiero cu el a haci. Awor lider di fraccion di AVP tin 2 aña cu e no ta fungi como lider di fraccion, pasobra

esey a keda confirma door di su lider di fraccion suplente, sra. Gerlien Croes.

Nos por conclui cu e pobreza berdadero di nos pais ta den e politica cu ta gaña, bruha tera, crea discordia, e politica cu ta pone beneficio propio prome cu beneficio di un pueblo!

**Pa abona na
SOLO DI PUEBLO**

**Yama
585 9500
of manda nos un
e-mail na
solodipueblo@gmail.com**

Entrega tur dia te den
bo port'i cas



REFLECCION

E SACRAMENTO DI BAUTISMO MESTER TA NA BABY

E bautismo ta e fundamento di tur e bida Cristian, e ta e porta pa e bida den Spirito Santo y entrada pa e otro Sacramentonan. Bijbel Echonan 2: 38 y 39; “Pedro a contesta: Comberti y laga cada un di boso ricibi bautismo den nomber di Hesu-Cristo pa pordon di boso pikanan. Y Dios lo duna boso E Spirito Santo, pasobra e promesa ta pa bosonan y pa boso yiunan y pa tur e hendenan cu Senjor ta yama.” E palabra comberti pa pordon di boso pikanan, esaki ta pa e hudiunan y tur hende cu no a ricibi e bautismo di Hesus. Hendenan y hudiunan nan mester kere den Cristo-Hesus y nan mester confesa nan pikanan, pa despues nan por ricibi e bautismo.

Pero e bautismo di Cristo-Hesus tambe ta pa e yiunan, yiunan tambe ta inclui e babynan recién naci, pa nan tambe por ricibi e promesanan di bira tempel di Spirito Santo y pa nan bira yiunan di Dios Tata y heredero di e Gloria Eterna. Bijbel Echonan 16: 29 -32; “E wardador di preso a pidi lus, e’l a core bay paden y a cay temblando na pia di Pablo y Silas. Despues e’l a hibanan pafor y a bisa: Shonnan kiko mi tin di haci pa mi haya salvacion? Nan a contesta: Kere den Senjor Hesus y tanto abo como bo hendenan di cas

lo ta salba. Despues nan a predica e palabra di Senjor na e wardador di preso y tur hende cu tabata tin den su cas.

E mes ora di anochi ey, e’l a bay cu nan y a laba nan heridanan. Despues e wardador di preso y tur su famia den cas a ricibi bautismo.” Despues cu e wardador di preso y su famia a scucha e palabra di Senjor y nan a kere den Cristo Hesus, nan tur incluyendo yiunan y babynan a ricibi e bautismo, pasobra famia ta yiunan y babynan. Bijbel Mateo 28: 18 -20; “Hesus a yega cerca y a bisanan: Na Mi ta duna tur poder den Cielo y na tera. Bay pues y haci tur pueblo bira Mi discipel y bautisa nan den Nomber di Tata y di Yiu y di Spirito Santo y sinjanan warda tur loke Mi a manda boso. Mira, Mi ta cu bosonan tur dia te na cabamento di mundo.” Akinan Hesus a manda Su Apostelnan pa bay predica, pa tur pueblonan di mundo kere y bira discipel di Hesus. Pero e palabra di sinja hendenan y di warda e palabranan di Dios, esaki ta pa e mayornan, tatanan y mamanan cu nan mester sinja nan yiunan y nan babynan ora cu nan crece, di warda e Palabranan di Dios. Pesey, akinan Hesus ta pone e Bautismo prome pa e babynan y despues e ensenyansanan cu

e tatanan y e mamanan mester duna nan yiunan y nan babynan ora cu nan crece. Bijbel Huan 3: 5 y 6; “Hesus a responde: Enberdad, enberdad Mi ta bisa bo: Si un hende no nace di awa y spirito, e no por drenta den Reino di Dios. Loke a nace di carni, ta carni y loke a nace di Spirito, ta Spirito.” Akinan Hesus ta bisa bon cla, si un hende of un baby no a ricibi bautismo pa medio di awa y Spirito Santo cu ta e Sacramento di Bautismo, e no por drenta den e Reino di Dios.

Pasobra, si un hende of un baby no a bautisa, e ta keda alma y curpa so, pero si un hende of un baby ta bautisa, anto e Spirito Santo ta bin biba den dje, e ta bira tempel di Spirito Santo, e ta bira yiu di Dios Tata, su bida eterna a cuminsa, e ta bira miembro di e pueblo nobo di Israel di Dios Tata, e ta bira miembro di Cristo Hesus Su unico Iglesia Universal y e hende of e baby ta bira heredero di e Gloria eterna di Dios Tata. Den e Evangelionan aki, Pablo, Silas y e otro Apostelnan (ta prome Obisponan). Pedro (ta prome Obispo y Papa).

Un mensahero di Dios.





HALA ROSEA LIBREMENTE



Cu introduccion di e ley aki DVG y Gobierno ta trata na reduci e risico pa malesanan cronico cu es cu ta huma por desaroya, como tambe proteha e 'second-hand smoker' y preveni e hoben di cuminsa huma na un edad jong.

Partido MEP:

FRANKLIN HOEVERTSZ TIN 100 MIYON MOTIBO PA TA ENVIDIOSO

El a organisa cantidad di conferencia, sin logra nada. Gobierno actual ta organisa 1 conferencia y logra un fondo di 100 miyon euro

Partido MEP a tuma nota di critica pisa di ex director di Utilities Franklyn Hoevertsz, den direccion di Prome Minister Evelyn Wever-Croes, y Minister Glenbert Croes.

Den un atake hopi infantil, sr. Hoevertsz a cuestiona e prome conferencia di clima y energia. Hoevertsz a trece diferente argumento padilanti, djis pa kibra e exito di e conferencia.

Entre otro a cuestiona cu e conferencia no tabata habri pa tur hende, siendo cu esey ta algo usual ora bo ta organisa un conferencia ministerial. Un conferencia riba nivel di ministernan tin su protocol, y Hulanda ta hopi estricto den esaki. Asina mes Gobierno di Aruba a incorpora segmentonan cu a invita studiantenan di EPI, y otro stakeholders. Tambe a transmiti e ultimo dia 'live'.

Partido MEP no ta bay den detayes di tur e criticanan, pasobra por nota cu nan ta basa riba envidia. Y ta comprensible, pasobra sr. Hoevertsz a organisa un cantidad di conferencia - por cierto sin invita comunidad di Aruba mes -, mas ainda, sin logra nada. Puro promesanan falso cu a costa pueblo di Aruba miyones di florin.

Di otro banda, e Gobierno actual, Gabinete Wever-Croes, ta organisa 1 conferencia y logra un fondo di 100 miyon euro. E fondo aki ta destina pa alivia e peso di ciudadanonan di pais Aruba, y lo bay completamente na e ciudadanonan di Aruba, Corsou y Sint Maarten.

Ta logico cu sr. Hoevertsz tin pues 100 miyon motibo pa ta envidioso, pasobra e no a logra ni 1 florin!



Mester bisa si cu sr. Hoevertsz tin hopi curashi si, despues di a wordo retira di Utilities, despues di no por a maneha e compania estatal cu no por a duna dividendo na gobierno, pa sali padilanti y critica e prome y unico conferencia cu realmente ta trece beneficio pa pueblo di Aruba.



“Penado NO ta sufri pa largo”

Skirbi pa drs. Melva Croes-Yáñez

Mi kier expresa na prome lugá un elogio na dr. Jayburt Dijkhoff pa comunica su conocimiento na comunidad riba derechon (y obligacion) como pashent, dunando asina e grupo di (futuro) pashentnan y nan famia un ‘bos’ cu su buki y charlanan elocuente den cada bario. Desde 1994 Fundacion Alzheimer Aruba (F.A.A.) a y ainda ta enfoca riba abuso y discriminacion di e adulto mayor (tambe como pashent); esta e fenomeno di ‘Edadismo’, tratando di duna e adulto mayor, su famia y cuidadornan un bos y sosten den e cuido di nan ser kerí.

Introduccion: Na 2011 a sali na cla cu AZV lo cuminsa corta riba cierto servicionan pa nos grandinan riba di 70 aña. Esaki tabata e punto cu a desemboca den un racha di articulo y entrestan (local y internacional) y asina sigi yuda conscientisa comunidad di e efectonan di ‘Edadismo’ riba bienestar psicologico di e adulto mayor y pashent, cu a lo largo por conduci na problemanan cognitivo, di salud mental (manera depresión, soledad, ansiedad, etc.), hasta na suicidio y morto prematuro. E temanan aki no a cay den bon tera cerca hopi profesional den cuido! Sigur no ora ta trata di abuso di nos grandinan den institucionan of na cas.

Mester subraya cu e grupo di Adulto Mayor, por lo general, ta hustamente e grupo cu mas tin mester y ta haci uso di servicionan di atencion medico, cuido y ‘Prevencion’(?) como asegurado. Ta un realidad tambe cu e grupo di adultonan mayor aki, tambe ta pensionado y ta e grupo cu ta forma un parti creciente den nos comunidad (segun estadística lo triplifica na aña 2050). Esaki tambe ta hustamente e grupo cu grandemente ta contribui na e seguro Nacional di AZV. Lastimamente ta hustamente e grupo aki tambe ta e grupo cu ta wordo discrimina pa motibo di edad (edadismo), tanto den cuido, como tambe den comunidad riba tereno laboral, socio-económico, financiero y psicosocial (tin biaha a proposito y tin biaha

inconsciente). Maske e declaracion Universal di Derechon Humano ta specifica cu tur adulto mayor tin mes derecho cu tur hende tambe derecho di protección y seguridad, ainda derecho di e adulto mayor, ta wordo negligencia, ignora, hasta viola.

Esaki pa entreotro falta structural di maneho, di informacion adecua, falta di conocimiento di derechon humano, stereotiponan den comunidad y instancianan, etc. Experiencia ta muestra cu mayora biaha miedo ta causa cu e adulto mayor y pashent, no kier of no ta desea di papia mes tocante su circunstancia penoso cu e ta pasa aden cu un medico / profesional. Tambe e miedo aki por causa cu e adulto mayor aki no por comunica su situacion adecuadamente, debi na limitacion cognitivo of pa motivo di diferencia cultural y problema di idioma. E miedo cerca e adulto mayor, como pashent sa bay asina leu cu e lo enfatisa pa e profesional NO comparti su situacion di abuso, cu autoridad. E hecho aki ta obstaculisa un cambio di mentalidad y tambe pa e abusanan aki por stop. Pa e adulto mayor y pashent mes, como victima, esaki a lo largo por desemboca den condicionan cronico (físico, psicologico / mental). Punto di enfoca di F.A.A. tur tempo ta y lo keda pa nos grandinan y nan cuidadornan/familiarnan (tambe na cas) cuminsa y sigi cuestiona esun cu ta duna servicio

(medico) dor haci pregunta ora cos no ta bay bon of ora e dunado di servicio (sea medico, profesional, etc.) negligencia (abusa) e adulto mayor y pashent, no kier duna e pashent su resultado y no ta respeta of falta respet pa (opinión) di e pashent of su cuidador. Sa pasa cu tin medico / profesional ta nenga cooperacion ora e pashent ta desea un segundo opinión riba su diagnosis (aki tin medico cu NO ta gusta esaki y por papia malo cu e pashent). Otro abuso cu ta casi normal, banda di edadismo, ta e fenomeno den mundo medico di no tene cuenta cu e idioma y



cultura di e pashent y/of ta papia tocante e pashent cu esun cu ta compañía e pashent y no ta dirigi su mes conforme na e adulto mayor y su pashent. Otro fenomeno cu tambe a normalisa pero cu ta cay bou abuso, ta e desaroyo, unda ta skeiro cu normanan Hulandes y impone esakinan riba nos cultura Caribense, e cultura di e adulto mayor, tambe riba otro culturanan den comunidad; tin biaha hasta cu consecuencia fatal/fastioso pa e adulto mayor como pashent. A bira ora pa comunidad cuminsa informa su mes y conose su derechon sigur como adulto mayor y pashent. Ainda tin hopi pashent y adulto mayor cu ta di opinión cu tur cos cu e dokter/profesional den cuido haci of bisa riba tereno di su salud ta e “verdicto final” pues no tin algo mas di bisa, tampoco puntra (sigur no den e 10 minuut cu dokter tin pa bo awendia).!!! Mi ta di opinión cu e Adulto mayor y pashent mester tuma su salud den su man y trata di laga miedo un banda. Tanten cu Bo estado cognitivo ta duna, Bo tin cu realisa cu ta abo ta doño di curpa y e dokter/ profesional t’ey pa yuda abo como su pashent y coopera cu Abo y contribui cu e parti di su expertisio / profesionalismo. E dokter/ profesional aki ta den servicio di Abo como Adulto mayor y pashent y no alreves!!! Mester realisa cu e medico tin e trabou ey danki cu Abo ta pagele via di bo seguro (AZV). Y e mester tey pa bo y duna bo e servicio necesario como su pashent. Por ultimo

mediconan/profesionalnan tambe ta hende y tambe por comete infraccionnan y of errornan. Djis pasobra e tin un of mas titulo of cu a studia na un universidad eloquente den exterior, No ta haci un medico omnipotente ni dunele poder di abusa di Bo! E charlanan di Sr. dr. Jayburt Dijkhoff ta priminti di lo trata topiconan alcaso y necesario pa comunidad; manera: Derecho di privacidad, derecho di acceso na informacion, derecho y obligacion di pashent, responsabilidad medico, derecho di entrega un keho na instancia y profesionalnan den cuido di adulto mayor (inclusivo AZV), y derecho di representacion legal. Iniciativanan manera esun di dr. Jayburt Dijkhoff aki ta aumenta conocimiento y actitudnan positivo riba derechon di pashent bou nos poblacion. Esaki na su turno por mehora e forma con hende lo buska ayudo y busca su derechon.

E charlanan aki y e conocimiento di su derechon sigur lo tin tambe un efecto positivo cerca e adulto mayor y pashent, cu awe ainda lo tin miedo pa revela su preocupacion tocante entreotro violación di su derechon como adulto mayor y pashent.

En corto lo duna e adulto mayor y pashent un “bos” y asina alivia of pone un fin na su sufrimento! Di parti di directiva di Fundacion Alzheimer Aruba (F.A.A.), Neuropsychological Ambulatory Aruba (N.A.A.) y mi persona ta desea dr. Dijkhoff pabien cu su iniciativa unico pa pais Aruba y pa yuda conscientisa nos comunidad (na Papiamento)! Sperando tambe cu un dia tur nos leynan lo ta disponibel, (banda di Hulandes), tambe den Papiamento pa asina tur ciudadano por conoce, comprende y eherce su derechon y obligacionan optimalmente. Ta un orguyo di mira con un Arubiano den persona di dr. Jayburt Dijkhoff ta marca historia riba e terenonan huridico, atencion medico y cuido na Aruba. Pabien dr. Jayburt Dijkhoff pa e logro grandi aki!